

**MATERA ANA WAKITÀ
UWANA POL
ATSETSÈR À TIMOTAWUS**
Première Lettre de Paul à
Timoth'ee

Ayyi

¹ Gi Pol, la uwana gətsetser wakità uwanay, gi masləlay anə Yesu Kristu, bokuba uwana asa à Zəzagəla Baba. Masla maβəl anu, ηgaha la Yesu Kristu uwana məfa madzugway gami à masla à afik.

² A kak Timotawus, kak kona gulo dziriga, uwana la madiᅇal gəl à vok la abà. Zəzagəla Baba gami, atà la Yesu Kristu Sufəl gami, tapis à ka gay à vok la mabasakan, ηgaha la mav à ka lapiya.

Mahəl à ahəᅇ kà azlamatapla uwana akəs vok aw

³ Uwana gənavà ka, à mok uwana gədà à kutso Makeduniya, ‘Dzà à ahəᅇ la Efesus’, gəgòd à ka, kà uwana azladza tapàhla azlamatapla mawisiga ala la ahəᅇ la abatà, ηgaha kà asà à gi kà: ‘Dzàw à ahəᅇ’, kagod à atà. ⁴ Gòd à atà kà: ‘Sàkàw mapəᅇ azlagay anə azlababa ankul maviyaga, ηgaha la azlawakità anə azlasləm anatà deydayga. Kà uwana azlagay uwaga kà, tatsalla magazlay à wan deyday pəra, uwaga kà adàᅇ sləray à Zəzagəla la uwana la abà, məsəl

la madiŋal gəl à vok la abà aw. ⁵ Uwana akəs vok!’ Kapəh à atà, kà tawoy azladza anik, ŋgaha la masal uwana asa à uda la ləv sətaka la tsəh, la madzugway delga, ŋgaha la madiŋal gəl à vok, uwana kaskas la tsəh aw. ⁶ Azladza anik tasàk à tetəvi dziriga la tsəh ala, ŋgaha tanəfa à azlatatak deydayga, kusoŋuga. ⁷ Tanərəz gəl aŋatà kà kiya atà, kà azlaməna matapla azladza anik lakəl aŋa Zəzagəla. Ama tasəl uwana tapəhay aw, tasəl tatak uwana tawadfa gəl à afik aw.

⁸ Anu kà, məsəl kà mapəhay aŋa Zəzagəla kà delga, à baŋa dza adahla sləray bokuba uwana akəs vok. ⁹ Baŋa uwaga avika ka aw: Mapəhay kà tadfahəŋ kà aŋa azladza dziriga aw, ama kà aŋa azlaməna tsakana, la azlauwana tapəsew Zəzagəla, la azlauwana takəs gay Zəzagəla aw, la azlauwana takweska Zəzagəla, la azlauwana tadəh mawisiga, la azlauwana tavəl à Zəzagəla à ahəŋ lakəl à adi, la azlauwana takad azlababa aŋatà la azlaiyə aŋatà, ŋgaha la azlaməna makad dza gesina. ¹⁰ Ŋgaha aya kà aŋa azlaməna à gəl gaw, la azlaməna matsatsəl vok kà atà kà atà zil zil, la azlaməna madaw dza ala, la azlaməna fida, la azlaməna mazaw mawadfa fida gà, ŋgaha la azlaməna madəh tatak gesina uwana la tetəvi aŋha aw. ¹¹ Matapla uwanay kà, asà à uda kà la gay marabəŋ uwana la abà kafà à gi à ahəl, ŋgaha uwana lakəl aŋa Zəzagəla, uwana mazləbay gà, uwana barka gesina atsa à uda la masla la abà koksikoksi.

Kikay kà vok mahamay aŋa Zəzagəla

¹² ‘Kikay’, gəgodf à Sufəl gulo Yesu Kristu uwana ahənagəla la ndzəda gesina kà aŋa sləray aŋha. ‘Kikay’, gəgodfal kà uwana anəŋ gi à adi, ŋgaha afà à gi à sləray aŋha à abà. ¹³ Kay, nəma kà, gəpəh mawisiga lakəl aŋha, dagay uwarà gədətərəbəŋ la matsəkal magodahay à gəl babay. Ama kà, vok ahamà à Zəzagəla kà gi, kà uwana mok uwatà kà, gi la madiŋal gəl à vok aw, ŋgaha bay kà, gəsəl uwana gədaŋaw aya. ¹⁴ Sufəl gulo adapis à gi gay à vok mənŋa mənŋa, ayyà agodf à gi, kà mav à gi madiŋal gəl à vok, ŋgaha la masal uwana ahamà à anu gay à vok la masla. ¹⁵ Aganay à gay uwana akəs vok kà azladza gesina takəsay: Yesu Kristu kà asà à waŋ à gudəŋ à vok kà mabəl azladza gesina uwana azlaməna tsakana. Gi la uwana gəduw à atà gesina la tsakana la tataka aŋatà la abà. ¹⁶ Uwaga à uwana, vok ahamà à Zəzagəla kà gi: Asal kà Yesu Kristu apəhla ala la gi la abà, kà gi la uwana gi masla tsakana kaykay. Mabasiŋ aŋha gesina uwana afehəŋ lakana kà, kà aŋa à huma à gay gesina babay, azlauwana tadiŋ gəl à masla à vok, tadəbəza sifa adəv à gay aw. ¹⁷ Zəzagəla la uwana Sufəl uwana amətsay aw, dza anəŋəŋ aw, masla kokudfa gəl aŋha, la uwana maslay la masləkaway la mazləbay agay la masla aŋa koksikoksi. Amen.

¹⁸ Timotawus, kona gulo, gəpəh à ka gay uwanay à ahəl: Awul à ka à gəl à gay uwana azlaməna mapəh à atà gay à ahəl tapəh lakəl aŋak uwarà. Gay aŋatà kà apakà ka tatak mapalla guvəl delga. ¹⁹ Kəsà madiŋal gəl à vok la madzugway delga. Ama azladza anik kà

takweska manəf madzugway delga aṇatà, ṅgaha kà uwaga à uwana tadinḡ gəl à azlatatak dziriga à vok aya aw. ²⁰ La tataka aṇatà la abà Himene atà la Alekəsander la ahəṇ, uwana gəbək atà à seteni à ahəl kà atà aṇa maguray, ṅgaha kà atà aṇa maβəz tetəvi aṇa mawisiga lakəl aṇa Zəzagəla aya aw.

2

Matapla lakəl aṇa madəv kudfa

¹ Teranḡ dadənḡ, gəfaha à akul akur à lig, kà akul aṇa manavay la slaka Zəzagəla la madəv kudfa, la ‘Kamkam’, ṅgaha la ‘Kikay’ kà aṇa azladza gesina. ² Say madəv kudfa kà aṇa azlaməṇ sufəl, ṅgaha kà aṇa azlaməna makoray gesina, kà anu aṇa madz à ahəṇ la titi la abà la lapiya, la manəb vok gami la Zəzagəla, la maday delga ṅgaha mawoyəṇ gə, kà la muwulla gəl à vədah la huma Zəzagəla, ³ aganay tatak uwana ahəf, ṅgaha akəs à Zəzagəla gami masla maβəl anu à gəl. ⁴ Asal kà azladza gesina tabəlay, tatsa à waṇ kà masəl gay dziriga aṇha, ⁵ uwana apəh à azladza kà, kà Zəzagəla kà tekula pəra, ṅgaha masla masəl anu vok la Zəzagəla kà tekula pəra, uwaga kà Yesu Kristu, uwana apakà dza la sləb vok. ⁶ Uwana asà à waṇ, avà gəl aṇha, kà anu gesina aṇa magay azlaaṇha la makor gəl la abà. Kiya uwaga agədà madzugway aṇa Zəzagəla à afik la kaslà uwana Zəzagəla akədəv à ahəṇ, asal maβəl azladza gesina. ⁷ Kà uwaga à uwana Zəzagəla apakəgəla kà masləlay aṇha. Gi masla matapla à maham à ahəṇ dza, kà gi aṇa mazəh

gay matsidayga à azlauwana azla Yahudiya aw, kà atà tadinjal gəl à vok. Gəpəhay kà dziriga, gəɗàh fida aw.

⁸ Asa à gi kà, kəla slaka gesina azladza tadəv kudfa, tadziyla ahəl aɗatà à slaka Zəzagəla kà madəv kudfa la ləv tekula, la kokudfa mapak ləv ɗgaha la kokudfa magazlay.

Azlamis la maham à ahəŋ mənə gay Zəzagəla la abà

⁹ Asa à gi babay kà azlamis taduww lukut uwana à vok akəsa à vok, la mazlayla kà vok, ɗgaha la mawulla gəl à vɗfah, awkà tadaha vok la zlazladfa, la azlamatsaha à gəl dzadzakwaga aw, baɗaw la kəsaf sləm luwəluwə gə, baɗaw la azlatatak bəɗə anik anik, baɗaw la lukut uwana tsakalay aɗha mənɗa aw. ¹⁰ Ama tatak uwana ahəɗ à atà kà, tadahla sləray dzəɓa aɗha səla aw gə. Azlamis uwana: ‘Məkəs Zəzagəla’ tagoɗ kà, say tadehəŋ kiya uwaga. ¹¹ Say azlamis takəs matapla la titi ɗgaha la mawulla gəl à vɗfah. ¹² Gəvə tetəvi à mis kà matapla baɗaw aɗa makoray lakəl aɗa azlazil aw, say tadza à ahəŋ titi. ¹³ Kà uwana teraɗa kà taɗəl kà Adama dadən, ɗgaha la lig la ahəŋ Hawwa.✧ ¹⁴ ɗgaha aya kà, seteni apapət kà Adama aw, ama apapət kà mis. Kiya uwaga à uwana mis akweska mapəhay aɗa Zəzagəla.✧ ¹⁵ Ama mis adəbələy kà la mayyi bəzi, à baɗa awəɗ vok à uda la madiɗal gəl à vok la abà, la masal, la tsikasla ɗgaha la mawulla gəl à vɗfah.

✧ **2:13** 2.13 1Musa 2.7,21-22 ✧ **2:14** 2.14 1Musa 3.1-6

3

Azlamasiga aṅa maham à ahəṅ məna gay Zəzagəla

¹ Aganay à gay uwana akəs vok: Baṅa dza ayàh kà masla aṅa magay masla manəṅla azlaməna manəfay anik kà, ayahani kà sləray delga gə. ² Masiga aṅa azlaanik kà, say agay kà dza uwana dza aslala vok aṅa matsədal gay à tsəh aw kəla. Agay zil aṅa mis tekula, agay dza tələmmaga, agay masla makəs gəl aṅha, agay dza uwana sləm aṅha la ahəṅ, agay masla makəs azlaməlok dza la ahəl səla, agay masla masəl matapla à azlaanik babay. ³ Aga masla guzu aw, masla magazlay aw, ama aga kà masla mabasiṅ, agay masla gay baṅaw masla mawoy sili aw. ⁴ Kəla kà, agay la maslay kà manəṅla huɸ gày aṅha lela, agay masla mawulla haṅkəli à azlabəza aṅha, kà atà aṅa matsən gay aṅha, ṅgaha kà atà aṅa mazləb masla. ⁵ Uwana gəpəh kiya uwanay kà: Kà uwana baṅa dza aslala vok aṅa makoray huɸ gày aṅha aw, ma kakay aslala vok aṅa manəṅla maham à ahəṅ məna gay Zəzagəla ma? ⁶ Dza mawga la maɸṅal gəl à vok la abà kà, kapakawwanṅ ala kà masiga la katskats aw, kà uwana baṅa mawga kà, zlahaw zlapay adal à gay, ṅgaha seriya atədal à gəl bokuba aṅa seteni uwana aga. ⁷ Say agay mawoyəṅ gə la huma à azladza, uwana tasəl Zəzagəla aw babay, kà masla aṅa magay mapəseyaw gə aw, ṅgaha masla aṅa matəɸ à melkaw aṅa seteni à abà aw.

Azlaməna mazlakay la maham à ahəṅ məna gay Zəzagəla la abà

⁸ Azlaməna mazlak maham à ahəŋ məna gay Zəzagəla kà, say tagay mawoy atà gə, tagay azlaməna magolla dza la mas guzu aw, baŋaw azlaməna mawoy sili la tetəvi mawisiga aw. ⁹ Say tatsizllay kà à dziriga aŋa madiŋal gəl à vok uwana à afik, Zəzagəla apəhatàla, takəsay uwaga la madzugway dziriga la ləv tekula. ¹⁰ Kəla kà, say maham à ahəŋ anərəz atà dadəŋ suwaŋ, à baŋa gay aga à atà la vok aw kəla, ŋgaha tada à sləray à abà. ¹¹ Azlamis aŋatà babay kà taga azlamis delga, taga azlaməna masàh gəl aw, taga azlatələmmaga, taga azladziriga la azlatatak gesina la abà. ¹² Say azlaməna mazlak à maham ahəŋ məna gay Zəzagəla, tagay la mis tekula tekula, tagay azlaməna manəŋla azlabəza aŋatà lela, la huɖ gəy aŋatà gesina. ¹³ Kà uwana baŋa tadəh sləray aŋatà kà tabəza gəl aŋatà la madz à ahəŋ lela la abà, ŋgaha tadəpəhay la magəɖəŋ à afik aŋa madiŋal gəl à vok, uwana anu la abà la maham gay à vok la Yesu Kristu.

Godega aŋa madiŋal gəl à vok

¹⁴ Amiyaka gi la manewəŋ la abà kà mad à awtəy, kà manəŋ ka nekwa kà, gətsetser à ka wakitə uwanay aya. ¹⁵ Kà uwana amiyaka gəda à awtəy katskats aw babay kà, wakitə uwanay adətapakalla madz à ahəŋ delga, lakəl aŋa huɖ gəy aŋa Zəzagəla, uwana maham à ahəŋ məna gay Zəzagəla, uwana azlaaŋa Zəzagəla uwana la sifa. Maham à ahəŋ uwaga kà maŋuləv aŋa matapla dziriga. ¹⁶ La tetəvi aŋa matapla uwaga,

Zəzagəla apəhlan̄ ala, ɲgaha apəhanula maday gami la tetəvi aɲha la tsəh.

Gay uwaga kà aduwa tatak gesina ndzer, uwaga lakəl aɲa dza, uwana apəhla vok ala, bokuba dza la sləb vok.

Masasəfok tsikasla apəhla masla ala, kà dza dziriga, ɲgaha azlamalika tanəɲan̄.

Azladza tatsənən̄ mapəhay aɲha, tazàhà gay aɲha à azladza uwana tasəl Zəzagəla aw, ɲgaha azladza gudən̄ à vok tadin̄ gəl à masla à vok.

La lig aɲa uwaga la ahən̄ kà, Zəzagəla azəb à zagəla à slaka mazləbay gə à abà.

4

Azlaməna matapla fida

¹ Masasəfok Zəzagəla apəhay la paraka kà, la makəd̄ gəl à ahən̄ kà, azladza anik tadàsaka madiɲal gəl à vok la tsəh ala. Tadàsakay kà gay aɲa azlamasasəfok mavavar dza, la azla-tatak uwana azlamasasəfok mawisiga, tapəhla ala. ² Azlaməna matapla uwaga kà, azlaməna magolla dza, à uwana tadàzah dza ala. Madzug-way aɲatà kà mamatsay. ³ Azladza uwaga kà tadàvarah gay kà mazəb mis la mazuw azlatatak anik anik. Tekedika Zəzagəla adəhàhà azlatatak uwaga kà, kà azlaməna madiɲal gəl à vok, uwana tasəl dziriga aɲa mazuway. A baɲa: 'Kikay', tagodal kà uwaga gesina kà, mawisiga aya aw. ⁴ Kà uwana dèwdèw tatak uwana Zəzagəla adəhən̄ kà delga. Tatak məzla gə la abà amiyaka tekula aw, ama say məbəza uwaga

kà la 'Kikay', la magod à Zəzagəla. ⁵ Kà uwana gay Zəzagəla la madəv kudfa gami la uwana taguwaga tsikasla.

Masla sləray dziriga aŋa Yesu Kristu

⁶ Baŋa katapla azlatatak uwanay à azladedə gami anik kà, kadəgay masla sləray dziriga aŋa Yesu Kristu, la uwaga kadəpəhla vok ala, kà kadzadzar vok la masasəfok dziriga aŋa madiŋal gəl à vok, ŋgaha la matapla dziriga uwana kanəfa gesina. ⁷ Ama matugway aŋa azladza deydayga, uwana akəs à Zəzagəla à gəl aw kà, wùts ala. Nəŋla gəl aŋak la guba aŋa Zəzagəla la abà, la mawad' vok à uda. ⁸ Makəs uwana asa à vok, kà la azlaslaka anik kà, akəs vok ŋuv ŋuv, ama mahoy guba aŋa Zəzagəla akəs vok kaykay, kà uwana uwaga kà adala anu à sifa à abà lagonay, ŋgaha bawbaw la huma la gay bay aya. ⁹ Uwaga la uwana gay makəs vok gà, à uwana naka kəla uwabeyuwi akəsay la ləv tekula. ¹⁰ Kà uwaga à uwana mədah sləray la mawad'ah vok à uda, kà uwana məfa manewəŋ gami kà à Zəzagəla uwana à afik la sifa, kà masla mabəl kà kaykay, kà azladza uwana tadiŋ gəl à masla à vok gesina.

¹¹ Sləhalla vok à azlaməna madiŋal gəl à vok tatak uwanay kà, tàpatàla uwaga lela. ¹² Kak bəzi dən nəma, ama kasak à dza apəsew ka aw. Gà la huma aŋa azlaməna madiŋal gəl à vok gesina la gay aŋak uwana la abà kapəhay, kà bokuba kak tetəvi aŋatà la maday aŋak la abà, la madz à ahəŋ aŋak la abà, la masal aŋak la abà, ŋgaha la madiŋal gəl à vok aŋak la abà

gesina. ¹³ Wàf vok à uda kà matapatàla kà uwana la wakità Zəzagəla la abà la mapəh à atà gay matsidayga, tsəràh à mok uwana gədàda à awtày. ¹⁴ Kapəsew mavày aṇa Zəzagəla, uwana avà à ka la maβəkla ahàl à gəl aṇa azlamasiga, uwana tapəh à atà gay ahàl lakəl aṇa mavày, uwana kabəzal kà aṇa sləray, aw. ¹⁵ Fà sləm à sləray uwaga la tetəvi aṇha, kà uwabeyuwi aṇa manəṇ kà, kà kaday kà à huma à gay pəra. ¹⁶ Kəsà gəl aṇak, cfahà haṇkəli la matapla aṇak babay. Baṇa kanəfa madəhəṇ delga kà, kadàbəlay, ṇgaha la azladza uwana tatsəb à ka sləm.

5

Maday aṇa azlaməna madiṇal gəl à vok

¹ Iyay zlà, gəgodf à ka aya kà, kaslah məl à makoz zil à gəl la ndzəda aw, ama kapəhal gay, kà bokuba uwana kapəh à baba aṇak. ṇgaha aya kasləha vok à azlamedfega babay kà bokuba uwana kadəhəṇ à azladedə aṇa gəl aṇak. ² Kəs azlagəl mis babay, kà bokuba azlaiyà aṇak, ṇgaha azlaiyaw mis babay, kà bokuba azladedə aṇak dəgam gà la ləv sətaka.

³ Fà sləm à azlamis kuḍa deṇdaṇga, sləkàw atà! ⁴ Ama kəla kà, baṇa mis kuḍa anik la bəzi amiyaka la bəzi aṇa bəzi aṇha bay kà, say asəl madàh sləray, manəfay aṇha la huma azlaməna huḍ gày aṇha, akəs iyà aṇha la ahàl səla, baṇaw iyà madzidziga aṇha, kiya uwaga la uwana akəs à Zəzagəla à gəl. ⁵ Mis kuḍa deṇdaṇga ndzer, uwana masla mafal sləm la ahəṇ aw, afà

madzugway aṅha kà à Zəzagəla à afik pəra, asak à madəv kudfa à Zəzagəla mavakay la mahanay aw, kà masla aṅa mazlakay. ⁶ Ama mis kudfa, uwana adza à ahəṅ la matsiday la abà kà, masla kà bokuba mamətsay gə, amiyaka adagay la sifa aṅa lakana. ⁷ Maslā gə la uwaga à uwana kapəh à atà, kà dza aṅa mabəz atà à tsəh la gay anik anik la abà aw, kà masləh à atà ala vok. ⁸ Baṅa dza afa à sləm à mayyi à tsəh ala aṅa baba aṅha aw, ṅgaha kaykay gə à məna huɖ gəy aṅha aw kà, masla kà akweska madiṅal gəl à vok, masla kà ṅuləm dza uwana aləg madiṅal gəl à vok.

⁹ Lagwa kà, katsetser sləm aṅa mis kudfa à sləm aṅa azlamis kudfa anik à adi la wakità la abà, kà say à baṅa adagay la mavay dzik mukwa dadàṅ. ṅgaha bay kà, say baṅa adà à zil kà asik tekula à ahəl pəra. ¹⁰ ṅgaha babay kà, say agay masəlay gə la azlasləray delga uwana la abà, adahàṅ, azigəna azlabəza aṅha la tetəvi delga la tsəh, ṅgaha akàs azlaməlok dza uwana tasàh à mtəga aṅha la ahəl səla, ṅgaha apalàh asik à azlaməna madiṅal gəl à vok, ṅgaha à baṅa azlakàhà à azlauwana la matərəbay la abà, ṅgaha la madz à ahəṅ aṅha la abà kà, adahàhà kà say sləray delga pəra, kà tsetsər sləm aṅha.

¹¹ Ama kweskà matsetser sləm aṅa azlamis kudfa medega à wakità aṅa sləm à afik, kà uwana la kaslā uwana madzugway aṅatà adàda à zil à tsəh kà, tadàgola vok à tetəvi aṅa Kristu la tsəh ala kà mad à zil. ¹² Kiya uwaga kà, tadàgay azlamawisiga, kà mapəzl makəs vok aṅatà uwana ala la madiṅal gəl à vok la abà.

¹³ Ngaha aya kà, tadàzah kaslà aṅatà ala, kà madahay gày la gày. Ama uwana zlazlafà kà: Tagay azlaməna gay zlawzlaw, ngaha la mavalàh à gay uwana à abà, abəza kà atà aw aya, bokuba azlamavdzagogur, ngaha la azlagay uwana azlayla atà aṅa mapəhay aw, bay kà tapahay. ¹⁴ Kà uwaga à uwana gəgod à ka: Asa à gi kà azlamis kudfa medega kà tadah à zil, tayyàh bəza, ngaha taf sləm à hudf gày aṅatà suwəṅ. Ngaha kà anu aṅa mav tetəvi à masla məzam gami, kà masla aṅa mapəh mawisiga lakəl gami aw. ¹⁵ Gəpəh kiya uwanay kà, kà uwana azlamis kudfa medega la ahəṅ, tawulla à tetəvi dziriga la tsəh ala kà manəf seteni. ¹⁶ Baṅa azlamis kudfa la ahəṅ la tsəhay aṅa mis madiṅal gəl à vok gə kà, say masla la uwana azlaka à atà. Awkà ayahla mazlakay aṅa maham à ahəṅ məna gay Zəzagəla aw, kà uwana uwaga kà mahanay məṅga. Say maham à ahəṅ məna gay Zəzagəla kà azlakay kà uwana dza aṅha la ahəṅ aw.

¹⁷ Azlamasiga uwana tanəṅla maham à ahəṅ məna gay Zəzagəla lela kà, azlayla à atà aṅa mabəz mazləbay hudf səla, zləbàw azlauwana taziṅ gay Zəzagəla kaykay, la azlauwana tatapla tatak à azladza anik, ¹⁸ kà uwana wakità Zəzagəla agodf kà: Kafa zagoma à kokur uwana à gay à baṅa azlaḅ hi aw. Kà uwana masla sləray kà azlayla kà vok, abəza masik aṅha.✧ ¹⁹ Baṅa tapuwa gudzi à masiga à gəl kà, kakəs la katskats aw, say baṅa azladza səla tapəh baṅaw məna sayda makər dāṅ kəla.✧ ²⁰ Sləh à atà à vok la

✧ **5:18** 5.18 5Musa 25.4 ✧ **5:19** 5.19 5Musa 17.6; 19.15

dazuwaya à azladza uwana tadàh mawisiga, kà guba akəs azlaanik kà madàh mawisiga uwaga.

²¹ 'Kamkam', gəgod à ka la huma aña Zəzagəla, ɲgaha la huma aña Yesu Kristu, ɲgaha la huma aña azlamalika uwana matsatsamanatà gà, kəs mapəhay uwanay, kà kasani azladza makasay, la sləray anjak uwana la abà kadəhəŋ gesina aw. ²² 'Kamkam', kavà vok aña maβək ahəl anjak à dza à gəl, kà masla aña madàh sləray aña masla mazlakay aw. Kada à tsakana aña azladza anik à abà aw, nənla gəl anjak la sətaka la abà.

²³ Kasah bə iyaw pəra aw, ama ɲuləm kasah iyaw matavəruk ɲuv ɲuv babay kà, kà huɖ anjak uwana akaɖ ka.

²⁴ Tsakana aña azladza anik kà, adəpəhla vok ala batsewya kokuda maβəz madàh seriya. Ama aña azladza anik kà adəpəhla vok ala kà bawbaw la huma la gay vuɖ seriya. ²⁵ Kiya uwaga babay à uwana, sləray dziriga adəpəhla vok ala. Amiyaka uwana dza anəŋəŋ lakana babay aw kà, ndzer adəpəhla vok ala.

6

¹ Azlamayà gesina kà, takəs gay aña azlaməŋga aŋatà la masləkaw atà lela, kà dza aña mapəh mawisiga lakəl aña Zəzagəla, ɲgaha lakəl aña matapla gami babay aw. ² Kəla mayà uwana məŋga aŋha kà masla madiŋal gəl à vok kà, apəsew masla kà uwaga aw, la magoɖay kà: Anu səla kà tekula, kà uwana anu la deda. Ama bə la uwaga kà, adəha sləray uwana dɖaɖuwa à gay uwana uwarà, kà uwana adəha sləray kà

aŋa dza uwana adav ləv aŋha à Kristu, ŋgaha awoya masla.

Matapla fidaga

Aganay tatak uwana katapla à azladza anik. Dzərəðàhàtála kà madfehəŋ. ³ Baŋa dza asəla matapla anik à waŋ, à baŋa anəfa kà azlagay dziriga aŋa Sufəl gami Yesu Kristu aw, ŋgaha akəs matapla gami lakəl aŋa madz à ahəŋ delga la huma aŋa Zəzagəla aw, ⁴ masla kà adazigəŋ gəl aŋha, asəl tatak aw, masla kà, asəl kà matsigay, ayah kà magazlay lakəl aŋa azlagay. Aganay tatak uwana atsa à uda la uwaga la abà: Maŋor, magazlay, la azlagay matafað ləv, la madzugway mawisiga lakəl aŋa azlaməna magay. ⁵ Masla kà agazlahay pəra, kà uwana madzugway aŋha kà mawisiga, asəl dziriga aya aw. Adzugw kà baŋa anəfa tetəvi aŋa Zəzagəla kà: ‘Gədàgay gorobu’, agodf.

⁶ Ndzer kà, manəf tetəvi aŋa Zəzagəla kà uwaga riba məŋga à baŋa dza akəsa madz à ahəŋ aŋha. ⁷ La dziriga kà, tatak la ahəŋ məsəlla à waŋ la ahəl à gudəŋ uwanay à vok aw, ŋgaha tatak la ahəŋ mədàdala la ahəl aya babay aw. ⁸ Baŋa anu la tatak may, ŋgaha la lukut kà, uwaga kà dəŋ aŋami. ⁹ Ama kà aŋa azla-uwana tayah magay gorobu kà, azlamavavaray tavavar atà, tasokw à madiŋay aŋa mavavaray à abà. Tawoya azlatatak kusoŋuga uwana tadala azladza à mazila ŋgaha à akəl à abà. ¹⁰ Kà uwana adi aŋa sili kà slilih aŋa tsakana gesina. Azladza tafa yewdi à uwaga à gay, kà uwaga à

uwana tazahla la tetəvi aña madiŋal gəl à vok la tsəh, tabiya matərəbay à gəl aŋatà kaykay.

Sawaray makəɗ gəl à ahəŋ

¹¹ Ama kak, à kak dza aña Zəzagəla, həl à ahəŋ la azlatatak uwaga la abà gesina. Yàh kà dziriga, la masləkaw Zəzagəla, la madiŋal gəl à vok, la masal, la mabasiŋ, ŋgaha la tələmma aña ləv. ¹² Pà slagəla dziriga aña madiŋal gəl à vok, kà kak aña maβəz sifa adəv à gay aw. Zəzagəla la uwana azalà à ka à sifa uwaga à abà, la mok uwana kazà gay sayda aña madiŋal gəl à vok aŋak, dzəba aŋha səla aw, la huma aña azladza aŋuvaw. ¹³ La huma Zəzagəla uwana av sifa à azlatatak gesina, ŋgaha la huma aña Yesu Kristu uwana azà sayda dziriga la huma aña PontsəyusPilatus, à uwana, gəfahakala akur à lig: ¹⁴ Kəs mapəhay, ŋgaha gəŋ sətaka la kokudə ŋazla aña àläh tsəràh à mavakay uwana Sufəl gami Yesu Kristu adəzlanjalay, hazlan. ¹⁵ Adàwul à waŋ, la kaslà uwana Zəzagəla akədəv à ahəŋ. Masla Zəzagəla kà, aga la maslay gesina, masla kokudə gəl aŋha la uwana Zəzagəla. Adza à ahəŋ la marabay la abà. Masla la uwana Sufəl aña azlasufəl, ŋgaha Məŋga aña azlaməŋga. ¹⁶ Masla kokudə gəl aŋha la uwana amətsay dikiɗiki aw. Masla adza à ahəŋ la uɗaka uwana la abà, dza aslala vok aña mad à awtəy aw. Dza la ahəŋ adanəŋ huɗ adi aŋha tetuwa aw. Mazləbay la maslay, uwana adəv à gay aw, aga la masla aña koksikoksi. Amen.

¹⁷ Fàhà à akur à azlaməna gorobu aña gudəŋ à vok uwanay à lig, kà atà aña magay azlazlapay aw, sləh à atà à vok la magodʼ à atà kà, tafa madzugway aŋatà à ləmana uwana à afik, adədəv à gay pəra aw, ama kikay tagodʼ à Zəzagəla, uwana avà à anu tatak uwaga gesina la maɸuw vok, ŋgaha kà anu aña magay la marabay. ¹⁸ Fahà à atà à akur à lig, kà atà aña maɸàh delga la ləmana aŋatà, kà atà aña magay azlagorobu la sləray delga aŋatà uwana la abà tafehəŋ. Say tavàh tatak aŋatà la azladza anik, taga azlahuŋwa aw. ¹⁹ Kiya uwaga kà, tadàhadʼ ləmana aŋatà à ahəŋ la slaka delga, kà atà aña maɸəz sifa dziriga. Uwaga kà bokuba dza uwana ataɸukw gày aŋha à ahəŋ.

²⁰ Kak, Timotawus, nənla tatak uwana tafà à ka à ahəl lela. Həl à ahəŋ kà azlagay deydayga, ŋgaha à uwana la tetəvi aña maɸiŋal gəl à vok aw, la azlamatsigay badaga, la azlauwana azladza tazalalla masəlay zəŋzəŋga, ama tsa uwaga kà, masəlay dziriga aw. ²¹ Azlaanik tasləkaw uwaga la huma azladza, ama tasak à tetəvi aña maɸiŋal gəl à vok la tsəh ala.

Vok mahamay aña Zəzagəla aga la akul.

**Wakità Zəzagəla Wakitə Anja Makəs Vok
Slawda Mawga (Cameroun)
Matal: Wakitə Zəzagəla Wakitə Anja Makəs Vok
Slawda Mawga (Cameroun) (New Testament)**

copyright © 2019 Wycliffe Bible Translators, Inc.

Language: (Matal)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 13 Jul 2024 from source files
dated 29 Jan 2022

03efbf2f-98ca-5534-8610-0be3a8c4b974